

Consellería de Cultura e Xuventude

Decreto 320/1992, do 12 de novembro, polo que se fixan os prezos públicos percibidos pola Xunta de Galicia nos arquivos e museos xestionados pola Comunidade Autónoma de Galicia e nos de titularidade autonómica.

A Lei 13/1991, do 9 de decembro, de taxas, prezos e exaccións reguladoras da Comunidade Autónoma de Galicia establece, no seu capítulo 2º do título II, o réxime xeral de xestión, recadación e recursos en materia de prezos públicos.

O artigo 12º da mencionada Lei sinala igualmente que os prezos públicos serán fixados por decreto, por proposta da consellería da que dependa o órgano ou entidade oferente.

Por outra parte, a Comunidade Autónoma de Galicia ten competencia exclusiva en materia de arquivos e museos de interese para Galicia, en virtude do disposto polo Estatuto de autonomía de Galicia, sen prexuízo do disposto no artigo 149.1.28 da Constitución. Así mesmo, a Comunidade Autónoma asumiu a xestión dos arquivos e museos de titularidade estatal sitos no seu territorio, en virtude do convenio asinado o 5 de decembro de 1989 co Ministerio de Cultura.

Sendo, pois, necesario regula-la percepción dos prezos públicos por servicios efectuados nos arquivos e museos de titularidade autonómica e nos xestionados pola Comunidade Autónoma, o Consello da Xunta de Galicia, por proposta do Conselleiro de Cultura e Xuventude, na súa reunión do día doce de novembro de mil novecentos noventa e dous,

DISPÓN:**TÍTULO PRELIMINAR.****Artigo 1º —Obxecto.**

O presente decreto ten por obxecto a fixación dos prezos públicos percibidos pola Xunta de Galicia nos arquivos e museos xestionados pola Comunidade Autónoma de Galicia e nos de titularidade autonómica.

TÍTULO I.

Prezos públicos percibidos nos arquivos de titularidade autonómica e nos xestionados pola Comunidade Autónoma.

Artigo 2º —Clases de prezos públicos percibidos nos arquivos.

Establécense os seguintes prezos públicos nos arquivos:

- a)—Copias de documentos.
- b)—Buscas.
- c)—Autorización para publicar fotocopias.

Artigo 3º —Copias.

Para os efectos deste decreto constitúen copias de documentos as reproducións de documentos depositados

nun arquivo mediante a utilización de sistemas mecánicos ou automatizados, realizada con fins non venais.

Artigo 4º —Buscas.

1. Constitúen buscas as localizacións de documentos non sinaturados por petición dun particular.

2. Serán gratuítas as buscas realizadas por petición de calquera institución pública ou dun particular cando a localización afecte a dereitos fundamentais del.

Artigo 5º —Autorización para publicar fotocopias.

Expedirase autorización para publicar fotocopias de documentos custodiados nun arquivo de titularidade autonómica ou xestionado pola Comunidade Autónoma sempre que o petionario non teña ánimo de lucro e a súa intención sexa de investigación ou con ánimo cultural.

TÍTULO II.

Prezos públicos percibidos nos museos de titularidade autonómica e nos xestionados pola Comunidade Autónoma.

Artigo 6º —Clases de prezos públicos en museos.

Establécense os seguintes prezos públicos que se percibirán nos museos de titularidade autonómica e nos museos xestionados pola Comunidade Autónoma:

- a)—Entrada.
- b)—Copias.

Artigo 7º —Entradas.

Nos museos de titularidade autonómica e nos xestionados pola Comunidade Autónoma percibirase o prezo das entradas, durante as horas habitualmente establecidas, dos estranxeiros non pertencentes á Comunidade Económica Europea non residentes en España, e dos pertencentes á Comunidade Económica non residentes que sexan maiores de vinte e un anos.

Artigo 8º —Copias.

Para os efectos deste decreto, constitúen copias de pezas de museos as reproducións dos obxectos depositados nun museo mediante calquera sistema.

TÍTULO III.**Tarifas.****Artigo 9º —Tarifas de arquivos.**

Os prezos públicos esixiranse nos arquivos de titularidade autonómica e xestionados pola Comunidade Autónoma de acordo coas seguintes tarifas:

- 0.1. Copias.
 - 0.1.1. Fotocopias: por cada folio:
 - A4: 12 ptas.
 - A3: 18 ptas.
 - 0.1.2. Listado de ordenador.
 - Por cada páxina: 12 ptas.
 - 0.1.3. Copia en diskette.

—Diskette de alta densidade:

3 1/2: 250 ptas.

5 1/4: 175 ptas.

—Diskette de dobre densidade:

3 1/2: 175 ptas.

5 1/4: 115 ptas.

—Por cada unha das páxinas: 12 ptas.

0.1.4. Microfilms.

—Por cada fotograma de 35 mm: 10 ptas.

—Por cada fotograma de 16 mm: 6 ptas.

—Reproducción en papel de un fotograma: 12 ptas.

0.1.5. Fotografía.

—Positiva 18×24: 250 ptas.

—Positiva 24×30: 300 ptas.

0.2. Buscas.

—Hora empregada: 260 ptas.

0.3. Autorización para publicar fotocopias: 138 ptas.

Artigo 10º —Tarifas en museos.

Os prezos públicos esixíranse nos museos de titularidade autonómica e xestionados pola Comunidade Autónoma de acordo coas seguintes tarifas:

0.1. Entradas: 200 ptas.

0.2. Copias.

0.2.1. Fotografía:

—Positiva 18×24: 250 ptas.

—Positiva 24×30: 300 ptas.

DISPOSICIÓN ADICIONAL

A xestión, liquidación e recadación dos prezos públicos establecidos neste decreto axustaranse ó disposto no Decreto 172/1992, do 26 de xuño.

DISPOSICIÓN DERRADEIRA

Este decreto entrará en vigor o día seguinte ó da súa publicación no *Diario Oficial de Galicia*.

Santiago de Compostela, doce de novembro de mil novecentos noventa e dous.

Manuel Fraga Iribarne
Presidente

Daniel Barata Quintas
Conselleiro de Cultura e Xuventude

IV. OPOSICIÓN E CONCURSOS

Consellería da Presidencia e Administración
Pública

Orde do 23 de novembro de 1992 pola que se elevan a definitivas as propostas de aspirantes que superaron o proceso selectivo, polo sistema de promoción interna e de acceso libre, para o ingreso no corpo superior de Administración da Xunta de Galicia.

De conformidade co disposto nas bases IV e V da convocatoria para o acceso ó corpo superior de Administración da Xunta de Galicia, levada a efecto por Orde do 24 de xuño de 1991 (DOG nº 127, do 5 de xullo de 1991), e remitida pola Dirección Xeral da Función Pública por proposta de opositores que superaron o proceso selectivo, elevada polo correspondente tribunal, esta consellería

RESOLVE:

1º.—Eleva a definitiva a correspondente proposta de opositores que superaron o proceso selectivo polas quen das de promoción interna e de acceso libre, publicándose como anexo da presente resolución.

2º.—Os opositores que constan no devandito anexo deberán remitir, no prazo de vinte días naturais contados a partir do seguinte ó da publicación desta resolución no DOG, á Dirección Xeral da Función Pública da Consellería da Presidencia e Administración Pública, os documentos a que se refire a base V da orde de convocatoria.

3º.—Contra a presente resolución os interesados poderán interpoñer recurso de reposición perante esta consellería no prazo de un mes a partir do día seguinte ó da súa publicación no DOG.

Santiago de Compostela, 23 de novembro de 1992.

Dositeo Rodríguez Rodríguez
Conselleiro da Presidencia e Administración Pública